

UCAPAN PERDANA MENTERI DI UPACARA MELETAKAN BATU ASAS BANGUNAN PUSAT ISLAM, DI JALAN LEMBAH, KUALA LUMPUR PADA 9^{HB} NOVEMBER, 1980

Bismillah-Hirrahma-Nirrahim.

Yang Berhormat Dato' Haji Mohd. bin Nasir¹, Yang Amat Berbahagia Tun-Tun, Yang Berhormat Menteri-Menteri dan Timbalan-Timbalan Menteri, Tuan-Tuan Yang Terutama Duta-Duta, Tuan-tuan dan Puan-puan sekalian.

Assalamu 'alaikum Warahmatullahi Wabarakatuh.

Segala pujian bagi Allah, Pentadbir Sekalian Alam. Salawat dan salam kepada Junjungan Besar, Nabi kita Muhammad Sallallahu 'alaihi wasallam, keluarga dan sahabatnya.

Syukur saya kehadiran Allah Subhanahu Wata'ala, kerana dengan limpah kurnia-Nya, dapat kita sama-sama hadir di majlis meletak batu asas bangunan Pusat Islam yang penting dan bersejarah ini. Sempena dengan permulaan tahun baru 1401 Hijrah, saya mengambil peluang ini untuk mengucapkan selamat menyambut tahun baru kepada umat Islam sekalian.

Satu Muharram kali ini memberi erti yang luas dan mendalam kepada umat Islam. Hijrah Rasulullah dari Mekah ke Madinah mempunyai berbagai hikmat yang harus menjadi tauladan dan panduan kepada umat Islam. Dengan panduan Allah, tindakan strategik Nabi kita menjadi titik permulaan bagi perkembangan dan kegemilangan Islam ke seluruh pelusuk dunia.

Pada hari ini juga umat Islam di seluruh dunia memasuki abad baru ke 15 Hijrah dengan penuh azam dan harapan untuk mengembalikan ugama suci Islam ke peringkat keagungannya. Sebagaimana kita maklum, kedatangan Abad Ke 15 Hijrah ini adalah disambut cara besar-besaran oleh seluruh umat Islam. Di negara kita, berbagai acara juga telah disediakan. Ketika kita memasuki Tahun Baru dan Abad Baru ini, marilah kita sama-sama berdoa kepada Allah Subhanahu Wataala, semoga kita

¹ Menteri Tak Berpotfolio di Jabatan Perdana Menteri.


umat Islam sentiasa mendapat pertunjuk dan perlindungan-Nya, ditambahkan iman dan ilmu pengetahuan dan dipandu melalui jalan keredhaan-Nya. Bersama-samalah kita berusaha menegakkan kalimah Tauhid dan kesucian Islam, sebagaimana maksud firman Allah dalam Al-Quran, Surah Al-Ma-i-dah, ayat ketiga: "Pada hari ini, telah Ku sempurnakan bagimu Ugamamu, dan telah Ku lengkapkan kepadamu nikmatKu, dan telah Ku redhai Islam sebagai Ugamamu".

Tuan-tuan dan Puan-puan sekalian,

Allah telah memberi rahmat-Nya, dengan menjadikan kita sebagai hamba-Nya yang menganuti Islam. Islam, sebagai agama yang lengkap dan sempurna adalah satu gedung yang penuh dengan segala peraturan dan ilmu pengetahuan, bagi memandu manusia untuk mencapai kejayaan di dunia dan akhirat. Tidak ada jalan yang singkat untuk mendapat keredhaan Allah. Kita dikehendaki mempelajari agama suci dan usaha-usaha ini tidak akan berakhir walaupun hingga ke akhir hayat. Kita juga dikehendaki berusaha untuk memperbaiki kehidupan kita dalam semua lapangan. Inilah tanggungjawab dan peranan kita yang berat, sebagai hamba dan khalifah Allah di dunia.

Masyarakat kita sebagai masyarakat moden, masyarakat berbilang kaum dan kepercayaan sedang menghadapi berbagai cabaran. Umat Islam dalam masyarakat kita juga tidak lepas daripada cabaran ini. Pengaruh kemelesetan akhlak dan keruntuhan moral, dadah, ajaran sesat, sikap keterlaluan dan militan, pelbagai jenayah dan ideologi yang bertentangan dengan Islam seperti komunisma, adalah ancaman kepada masyarakat dan umat Islam di negara kita dan di seluruh dunia. Perisai dan benteng yang dapat menyelamatkan umat Islam daripada gejala-gejala yang merbahaya ini ialah Islam. Bukan ajaran yang terpesong atau ajaran yang diputarbelitkan, tetapi Islam yang sebenar-benarnya yang mempunyai teras keseimbangan, kesederhanaan dan toleransi, persaudaraan dan moral yang tinggi, serta hormat-menghormati sesama manusia.

Pada hemat saya, ada tiga faktor penting yang harus diberi perhatian. Pertama—kecetekatan asas pengetahuan Islam di kalangan sebahagian daripada umat Islam. Kedua—masyarakat Islam sedang dahagakan ilmu pengetahuan Islam yang mendalam. Ketiga—musuh-musuh Islam, dengan tujuan-tujuan tertentu, cuba



YAB Dato Hussein Onn di upacara meletak Batu Asas Komplek Pusat Islam di Jalan Perdana, Kuala Lumpur pada 9hb November, 1980.

menggunakan apa-apa jua kelemahan dalam masyarakat untuk menggugat negara dan melemahkan Islam. Umat Islam hendaklah sentiasa berwaspada dengan keadaan ini.

Sebagai umat Islam, kita mestilah mengikut syariat yang telah ditentukan. Rukun Islam dan syariat, adalah asas yang tidak boleh dipertikaikan. Ia adalah pagar yang melindungi kita daripada terkeluar daripada garisan Islam. Kita hendaklah berwaspada terhadap mereka yang mencari jalan singkat sehingga mereka telah terjerumus ke jalan sesat yang merugikan mereka dan merosakkan kesucian Islam.

Kita merasa dukacita di atas kesesatan yang wujud di kalangan sebilangan anggota umat Islam. Tindakan melulu dan tidak berperikemanusiaan, adalah terkeluar daripada kehendak agama kita. Tindakan tegas perlu diambil bagi membentasi kegiatan yang merbahaya ini. Di samping itu, usaha-usaha yang lebih berkesan dan terkawal hendaklah dijalankan bagi meningkatkan pengajaran Islam di kalangan masyarakat. Semua pihak hendaklah mengkaji semula usaha-usaha yang dijalankan dengan tujuan untuk memperkemas strategi mengembangkan Islam dan memajukan umat Islam dalam konteks masyarakat dan negara kita. Pada hemat saya adalah penting bagi ulama dan cerdik-pandai dalam masyarakat kita berganding bahu bagi menghadapi masalah yang kita hadapi sekarang. Penggunaan cara yang lebih berkesan serta penyesuaian teknologi moden dalam kegiatan dakwah hendaklah diusahakan. Penyediaan yang sesuai hendaklah dijalankan bagi memahami kelemahan-kelemahan umat Islam dan seterusnya memperbaiki kedudukan mereka dari segi kemajuan rohani dan jasmani.

Tuan-tuan dan Puan-puan sekalian,

Kerajaan telah dan akan menjalankan usaha-usaha bagi meningkatkan syiar Islam di negara kita. Majlis pagi ini menandakan setapak lagi kemajuan kita dalam usaha ini. Bangunan Pusat Islam yang baru akan menjadi Pusat Pentadbiran Bahagian Agama, Jabatan Perdana Menteri, Urusetia Majlis Kebangsaan Bagi Hal Ehwal Agama Islam Malaysia, Pusat Penyelidikan Islam dan lain-lain. Saya harap dengan wujudnya bangunan baru ini nanti kegiatan-kegiatan yang dijalankan dapat ditingkatkan lagi. Saya mengucapkan tahniah kepada mereka yang telah bekerja

keras merancang projek ini dan berharap, ianya dapat dilaksanakan mengikut jadual dengan jayanya. Saya juga mengambil kesempatan ini untuk mengucapkan terima kasih kepada Amir Kuwait yang telah bermurah hati memberi sumbangan kewangan sebanyak \$50,000.00 kepada Pusat Islam.

Wabillahi taufiq Walhidayah, Wassalamu alaikum Warahmatullahi Wabarakatuh.